

**SANDRA IMŠIROVIĆ**  
delegatkinja u Domu naroda  
Parlamenta Federacije Bosne i Hercegovine

Bosna i Hercegovina  
Federacije Bosne i Hercegovine  
**PARLAMENT**

Prilijeno:	15-12-2020
Org. jed.	02-02-2080/20

**PARLAMENT FEDERACIJE  
BOSNE I HERCEGOVINE  
DOM NARODA**  
n/r gđin Tomislav Martinović, predsjedavajući

U skladu sa članom 164. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03, 21/09 i 24/20) u prilogu Vam, radi razmatranja i donošenja po skraćenom postupku, dostavljam **PRIJEDLOG ZAKONA O DOPUNI ZAKONA O ZAŠTITI STANOVNIŠTVA OD ZARAZNIH BOLESTI.**

S poštovanjem,

DELEGATKINJA

Sandra Imširović

*Sandra Imširović*

## **PRIJEDLOG ZAKONA O DOPUNI ZAKONA O ZAŠTITI STANOVNIŠTVA OD ZARAZNIH BOLESTI**

### **Član 1.**

U Zakonu o zaštiti stanovništva od zaraznih bolesti ("Sl. novine FBiH", br. 29/2005) u članu 6. dodaju se novi stavovi 3. i 4. koji glase:

(3) „Ukoliko se epidemija zarazne bolesti proglašuje u skladu sa stavom 1. ovoga člana, državljanin BiH na području FBiH ima pravo na besplatno zdravstveno osiguranje za vrijeme trajanja epidemije i u roku od 60 dana od dana proglašenja prestanka epidemije“.

(4) „Ukoliko se epidemija zarazne bolesti proglašuje u skladu sa stavom 2. ovoga člana, državljanin BiH na području kantona koji je proglasio epidemiju zarazne bolesti ima pravo na besplatno zdravstveno osiguranje za vrijeme trajanja epidemije i u roku od 60 dana od dana proglašenja prestanka epidemije“.

pri čemu dosadašnji stav 3 postaje stav 5.

### **Član 2.**

Ovaj zakon stupa na snagu osmog dana od dana objavljivanja u „Službenim novinama Federacije BiH“.

## **OBRAZLOŽENJE**

- **USTAVNI OSNOV**

Ustavni osnov za donošenje ovog zakona sadržan je u članu III. 1. b) i c) i članu IV. 4.a) Ustava Bosne i Hercegovine.

- **RAZLOZI ZA DONOŠENJE ZAKONA**

Epidemija COVID-a u BiH ukazala je neophodnost na dopunu zakonskog propisa, koji datira iz 2005 godine, kako bi se svim građanima/građankama FBiH pružila adekvatna medicinska pomoć i njega tokom trajanja epidemije. Obzirom da svi građani/građanke FBiH/kantona nemaju obavezno zdravstveno osiguranje, što predstavlja veliki problem u situaciji u kojoj se nalazimo, smatram potrebnim da se izvrši dopuna navedenog zakona.

Prema dostupnim informacijama oko 7% stanovništva na području TK nema zdravstveno osiguranje, što predstavlja oko 32.000 stanovnika. Broj osoba je na nivou Federacije BiH mnogo veći.

Dopunom navednog zakona izbjegava se i kršenje Zakona o pravima, obavezama i odgovornosti pacijenta („Sl.novine FBiH“, broj 40/10). Konkretno u članu 7. se normira da svaki pacijent ima pravo na dostupnu zdravstvenu zaštitu u skladu sa zdravstvenim stanjem i ličnim potrebama, zakonom i u granicama materijalnih mogućnosti sistema zdravstvene zaštite, te se u članu 60. nalaže da zdravstveni radnik ne može odbiti liječenje pacijenta u slučaju zarazne bolesti. Navedeno pravo obuhvata i pravo pacijenta na hitnu medicinsku pomoć koju nije moguće uslovljavati statusom zdravstvenog osiguranja, a što je uređeno Zakonom o pravima. Smatram da pacijent koji je obolio od COVID-a mora imati pravo na hitnu medicinsku pomoć i besplatno zdravstveno osiguranje koje će mu omogućiti daljnje liječenje oboljenja koja su nastala kao posljedica COVID-19.

Također, ovom dopunom se želi osigurati besplatno vakcinisanje cijelog stanovništva na području Federacije Bosne i Hercegovine u cilju suzbijanja pandemije COVID-19.

#### • **PRINCIPI NA KOJIMA JE PRIJEDLOG ZAKONA ZASNOVAN**

Prvi princip na kojem je zasnovan ovaj prijedlog zakona je princip nediskriminacije i to zbog činjenice da starije osobe imaju teže posljedice od COVID-19 i samim time njihovo liječenje oboljenja koja uzrokuje COVID-19 može trajati duže nego što je period zaraze, kao i osobe koje su zbog bilo kojeg razloga izgubili pravo na zdravstveno osiguranje a nisu u mogućnosti platiti troškove liječenja i/ili vakcinacije i onemogućeno im je liječenje mimo hitnih intervencija.

Drugi princip je princip pravne sigurnosti i to koncept legitimnih očekivanja iz razloga što je interes cijele Federacije Bosne i Hercegovine da se suzbije širenje virusa COVID-19 i da se smanji smrtnost prouzrokovana njegovim djelovanjem. Građani Federacije Bosne i Hercegovine očekuju da se nakon perioda zaraze njihovo liječenje nastavi iako nisu osiguranici, jer bi liječenje pacijenata isključivo za vrijeme zaraznosti bilo neučinkovito i uzaludno, te bi vakcinacija svih građana Federacije Bosne i Hercegovine bila učinkovitija u suzbijanju širenja virusa.

Posljednji princip su principi solidarnosti, humanosti i društvene odgovornosti jer se radi o životima građana Federacije Bosne i Hercegovine.

#### • **FINANSIJSKA SREDSTVA**

Za provođenje dopune ovog Zakona potrebna su dodatna sredstva iz budžeta kantonalnih zavoda zdravstvenog osiguranja te drugih izvora finansiranja iz budžeta Federacije Bosne i Hercegovine. Ova dopuna zakona se tiče zaštite prava državljana FBiH i omogućavanja istih, kako je to definisano Zakonom o pravima, obavezama i odgovornosti pacijenta („Sl.novine FBiH“, broj 40/10). Za provođenje dopune ovog Zakona nisu potrebni dodatni kadrovi, prostorije niti oprema jer se radi o osiguravanju osoba na području Federacije BiH zbog pandemije COVID-19 koji nemaju zdravstveno osiguranje. Procjenu troškova provođenja

dopune ovog zakona će napraviti kantonalni zavodi zdravstvenog osiguranja koristeći podatke o broju osoba koje su izgubile zdravstveno osiguranje ili koji nisu osigurani iz bilo kojeg razloga.

## ČLAN ZAKONA KOJI SE MIJENJA

### Član 6

- Epidemiju zarazne bolesti u dva ili više kantona proglašava i određuje zaraženim odnosno ugroženim područjem federalni ministar zdravstva (u daljnjem tekstu: federalni ministar) na osnovu epidemiološkog izvještaja zdravstvene ustanove i kantonalnog zavoda za javno zdravstvo (u daljnjem tekstu: kantonalni zavod), uz stručno mišljenje Zavoda za javno zdravstvo Federacije Bosne i Hercegovine (u daljnjem tekstu: Federalni zavod).
- Ukoliko je epidemija prisutna na području jednog kantona proglašava je kantonalni ministar zdravstva (u daljnjem tekstu: kantonalni ministar), uz prethodnu saglasnost federalnog ministra, na osnovu epidemiološkog izvještaja zdravstvene ustanove i kantonalnog zavoda i uz stručno mišljenje Federalnog zavoda.
- Proglašenje epidemije iz st. 1. i 2. ovog člana objavljuje se u "Službenim novinama Federacije BiH".